

17 FEB 1998

Mahathir-LTDL

DR MAHATHIR TIBA DI LANGKAWI UNTUK MERASMIKAN LTDL

LANGKAWI, 17 Feb (Bernama) -- Perdana Menteri Datuk Seri Dr Mahathir Mohamad tiba di sini hari ini untuk merasmikan perlumbaan basikal terkemuka edisi ketiga Le Tour de Langkawi 1998 (LTdL `98).

Sebaik tiba dengan sebuah pesawat khas, beliau terus ke sebuah hotel terkemuka di Teluk Burau di sini, yang menjadi tempat penginapan pelumba-pelumba kejohanan itu, bagi menghadiri majlis jamuan makan tengah hari.

Dr Mahathir kemudian diperkenalkan kepada pengurus-pengurus pasukan yang menyertai perlumbaan itu.

Perlumbaan edisi ketiga selama 12 hari itu akan bermula dari Langkawi dan berakhir di Dataran Merdeka Kuala Lumpur pada 3 Mac.

Esok, para pelumba akan menyertai peringkat pertama Jelajah Langkawi bagi acara ujian masa perseorangan dari Datai ke Jalan Pantai Kok sejauh kira-kira 16km.

Pengerusi Telekom Malaysia Berhad, Datuk Mohd Ali Hassan dijangka akan melepaskan pelumba-pelumba di Kelab Golf Teluk Datai di sini kira-kira pukul 8.30 pagi.

LTDL mendapat pengiktirafan sebagai perlumbaan terbaik di Asia dan acara lumba basikal ketiga terbesar selepas Tour de France dan Giro de Italia.

Perlumbaan itu akan menyaksikan jaguh-jaguh bertaraf dunia bertanding di samping pelumba terbaik dari benua Asia.

Perlumbaan 12 peringkat itu, yang dianjurkan oleh First Cartel (Malaysia) Sdn Bhd akan disertai kira-kira 150 pelumba dari 25 pasukan terbaik dunia dan kelab profesional dari Itali, Belanda, Jerman, Britain, Finland, Kazakhstan, Australia, Afrika Selatan dan negara-negara di Asia.

Mapei Bricobi, yang merupakan pasukan lumba basikal nombor satu dunia bagi empat tahun berturut-turut, dengan rekod 97 kemenangan dalam beberapa perlumbaan peringkat antarabangsa dijangka menjadi pencabar utama dalam kejohanan lumba basikal di Langkawi itu.

Anggota pasukan itu terdiri daripada Andrea Tafi, Giuseppe Di Grande, Giuliano Figueras, Gabriele Missaglia, Daniele Nardello dan Zbigniew Spruch.-- BERNAMA

NH RI